

Powšitkowne WOZJEWJENJA

njedźelu, 10. měrca 2013

„Tam so dótkatej njebo a zemja ...“

Z literariskim programom „Štó da trjeba jandžela?“ z „Theaterkompanie Leipzig“ so póndźelu, 11. měrca, lětuši rjad póstnych seminarow w Smochčanskim Domje biskopa Bena pod hesłom „Tam so dótkatej njebo a zemja ...“ zakónči. Započatk je w 19.30 hodź. Mjez sobuzarjadowarjami je Towarstwo Cyrila a Metoda z.t.

Za putnikowanje Serbow na Morawu so bórže přizjewić

Składnostnje 1.150. róčnicy přichada swjateju Cyrila a Metoda na Morawu planuje Towarstwo Cyrila a Metoda z.t. (TCM) wot štwórtka do njedźele, 4. do 7. julija, putnikowanje wěriwych ze serbskich wosadow na Velehrad. Na swjatočnu Božu mšu pjatk, 5. julija, je tež bamž přeprošeny. Nadrobniše informacije so hišće wozjewja. Płacizna wučinja z połpensiju dohromady 195 eurow. Štóž ma zajim, so na tutym putnikowanju na Morawu wobdźělič, njech so skazanja hotela dla hač do pjatka, 15. měrca, w redakciji Katolskeho Posoła přizjewi, telefonowe čisło (0 35 91) 55 02 12.

„Na zapokazanje biskopa Kocha do Drježdźan

Na Božu mšu ze zapokazanjom noweho Drježdźansko-Mišnjanskeho biskopa Heinerja Kocha su wšitcy wěriwi sobotu, 16. měrca, w 10 hodź. do Drježdźanskeje katedrale přeprošeni. Štóž w cyrkwi hižo městno njenańdže, změje składnosć, Božu mšu na Hrodowym naměsće na widejowej scěnje scěhować. Telewizija MDR tutu Božu mšu live přenese. Wjace pokiwow pod www.posol.de

Putnikowanje swójbow

Putnikowanje swójbow ze serbskich wosadow do Róžanta budže pod hesłom „Durje wěry su nam wotewrjene“ na pjatej póstnej njedźeli, 17. měrca. Božu mšu w 9 hodź. změje Budyski tachantski farar Wito Šćapan w hnadownej cyrkwi.

Zhromadny dzeń za 3. a 4. lětnik

Pod hesłom „Połčas“ přeprošuje Dekanatne dušepastyrstwo džěci 3. a 4. lětnika na zhromadny dzeń sobotu, 9. měrca, wot 9 do 15 hodź. do Don Boskoweho domu we Worklecach. Zajimcy njech so prošu hač do wutory, 5. měrca, pod telefonowym čisłom (03 57 96) 8 87 07 we Worklecach přizjewja. Za wudawki dnja zběra so wot kóždeho wobdźělnika přinošk we wysokosći třoch eurow.

Póstny wopor młodžiny

Póstny wopor młodžiny zběra so lětsa za jednu pěstowarnju w Brazilskej. Tutu pěstowarnju wopytaja někotři młodostni z našeho biskopstwa w zwisku ze swětowym zetkanjom młodžiny. Nadrobniše informacije su we wuwěšku we wosadach podate. Wobalki za póstny wopor leža w cyrkwjach.

Dnej za 5. a 6. lětnik pod hesłom „Štó sym?“

Pod hesłom „Štó sym? - Ja sym ja!“ přeprošuje Dekanatne dušepastyrstwo džěci 5. a 6. lětnika w jutrownych prózdninach na zhromadnej dnjej do Don Boskoweho domu we Worklecach, a to wot srjedy do štwórtka, 3. do 4. apryla. Zajimcy njech so prošu pod telefonowym čisłom (03 57 96) 8 87 07 hač do póndźele, 25. měrca, we Worklecach přizjewja.

Příležitost k swjatej spowědži w Róžeńće

sobotu, 16. měrca 17.00 – 18.00 hodž.	farar M. Anders, farar G. Nawka farar B. Jakubaš, farar J. Magiera
pjatk, 22. měrca 17.30 – 18.30 hodž.	farar C. Hrjehor, farar B. Jakubaš, farar H. Morawietz
sobotu, 23. měrca 17.00 – 18.00 hodž.	farar G. Nawka, farar D. Dzikiewicz farar M. Ulrich, farar S. Foelz
póndželu, 25. měrca 18.30 – 19.30 hodž.	farar M. Anders, farar P. Kral, farar D. Dzikiewicz, farar B. Jakubaš
wutoru, 26. měrca 18.30 – 19.30 hodž.	farar G. Wornar, farar M. Anders, farar M. Ulrich, farar S. Foelz

Putniski musical předstaji so w Budyšinje

Njewšědne dožiwenja na putnikowanju džěći do zašłosće po wikowskej dróze Via Regia su tema musicala, kotryž předstaji so njedželu, 10. měrca, w 17 hodž. w Němsko-serbskim ludowym džiwadle w Budyšinje. Tak mjenowany putniski čah džěći, mjez nimi tež serbskich, je Džěćacy a młodžinski komitej Zhorjelskeje ludoweje šule w léću 2011 organizował. Tehdy běchu wot Smochćic přez Budyšin do Zhorjelca po puću. Zo bychy swoju zahoritosć mnohim ludžom dale dali, je so 50 džěći, młodostnych a dorosćenych z rozdžělnych kónčin Sakskeje na inscenaciju musicala zwažiło, kotryž je za džěći a dorosćenych mysleny.

Putniska jězba do Lourdesa, Neversa a Flüeli

Pućowanski běrow ATeams poskićuje wot srjedy do štwórtka, 25. septembra do 3. oktobra, putnisku jězbu z busom do Lourdesa, Neversa a Flüeli. Duchowny nawod změje farar Andrzej Glombitza z Leutersdorfa. Šoferka budže Cordula Lešawina. Dalše informacije poda a přizjewjenja přijimuje Andreas Thomas w Šěrachowje, Cyrkwinska hora 1, telefonowe čisło (0 35 92) 3 58 98 55. Wjace pod www.ateams.de

Młodžina za křižom z Kukowskeho hrodžišća přez póstny čas

W póstnym času su młodostni lětsa přeprašeni so při křižu z Kukowskeho hrodžišća schadžować k modlenju a rozpominanju. Křiž bu lěta 1984 na Kukowskim hrodžišću postajeny a zwjazuje wot toho časa wosebje młodžinu ze zbóžnym martrarjom, kapłanom Alojsom. Po tym, zo křiž přez naše wosady scěhujemy, chcemy jón zaso na nasypje Kukowskeho hrodžišća postajić. Zakónčimy póstny puć z křižowym pućom dekanatneje młodžiny bołmončku w Chrósćicach. Tam křiž nachwilnje wostanje, doniž jón na hrodžišćo njedonjesemy.

Přehlad přichodnych zarjadowanjow w póstnym času

- sobotu, 16. měrca**, w 19.30 hodž., Zdžěr, cyrkej
start a přewod křiža z awtami a motorskimi do Dobrošic, tu je w 20.00 hodž. komplet,
po tym modlenje před Najswjećišim
- sobotu, 23. měrca**, w 19.30 hodž., Dobrošicy, kapałka
start a přewod křiža z awtami a motorskimi do Chrósćic, tu je w 20.00 hodž. komplet,
po tym příležitost k swjatej spowědži
- njedželu, 24. měrca**, w 14.00 hodž., Chrósćicy – křižowy puć dekanatneje młodžiny
Farar Měrcin Deleńk, dekanatny młodžinski dušepastyr